

Nama : _____

Tarikh : _____

BAHAGIAN A: SISTEM DAN APLIKASI BAHASA

[35 markah]

- 1 *Baca petikan di bawah dengan teliti. Kenal pasti dan senaraikan empat kata kerja. Kemudian bina satu ayat anda sendiri daripada setiap kata kerja tersebut untuk menunjukkan bahawa anda faham akan maksud dan penggunaannya. Anda tidak boleh menggunakan perkataan itu sebagai peribahasa atau nama khas.*

Demam denggi merupakan penyakit yang dibawa oleh nyamuk aedes. Nyamuk aedes membiak di kawasan saluran air, bekas menyimpan air dan bekas yang tidak digunakan. Oleh itu, kita perlu bergotong-royong membersihkan kawasan sekeliling rumah dan sekolah. Kita haruslah memeriksa bekas saluran air bagi memastikan air tidak bertakung. Selain itu, kita juga perlu menutup semua bekas menyimpan air serta memasukkan ubat jentik-jentik. Kita juga perlu membuang bekas yang tidak berguna. Semburan asap secara berkala juga perlu dilakukan oleh pihak berkuasa.

[8 markah]

- 2 *Berdasarkan petikan di bawah, kenal pasti dan tulis subjek dan predikat yang lengkap bagi tiga ayat yang anda pilih.*

Permainan tradisional yang paling popular di negara kita ialah wau, batu seremban, congkak, gasing, konda-kondi dan banyak lagi. Permainan tradisional dimainkan sama ada oleh kanak-kanak, remaja atau orang dewasa. Permainan tradisional seperti permainan moden dapat membina fizikal kerana pemainnya perlu bergerak aktif, pantas dan laju. Seseorang yang aktif dalam permainan lazimnya mempunyai bentuk badan yang cantik dan sahsiah yang baik. Permainan tradisional tidak memerlukan peralatan khusus seperti raket, kasut, bola dan gelanggang tersendiri. Alat yang digunakan sungguh mudah dan boleh didapati di sekeliling kita seperti biji buah, kayu, buluh ayam dan sebagainya.

Dipetik dan diubah suai daripada
'Remaja dan Permainan Tradisional'
oleh Hanapi Dollah
Dewan Siswa, September 2009
[6 markah]

- 3 *Bahan-bahan di bawah mengandungi pelbagai kesalahan bahasa. Kenal pasti, senaraikan dan betulkan kesalahan-kesalahan tersebut. Anda perlu menulis kesalahan-kesalahan yang dikenal pasti dan membuat pembetulannya. Anda tidak perlu menyalin petikan tersebut.*

Bahan 1

Semangat cinta akan negara mesti dididik sejak di bangku sekolah lagi dan disuburkan di jiwa rakyat secara terus. Rasa cinta akan negara akan menjadikan setiap rakyat merasa bertanggungjawab untuk menaikkan negara dalam pelbagai bidang sama ada sosial, ekonomi, politik, agama, budaya, sastera atau pendidikan. Penggubalan Perlembagaan Malaysia membuktikan wujud semangat toleransi, rela berkongsi kuasa, sedia berkorban, saling faham-memahami dan bersatu padu antara berbilang kaum, agama dan budaya. Memahami maklumat tersurat dan tersirat dalam Perlembagaan sangat penting bagi memupuk rasa cinta rakyat kepada negara. Melaluinya akan terjadi persefahaman, keinginan dan keupayaan untuk mencapai perubahan dan yang lebih mustahak, kesungguhan membina maruah dan harga diri.

[6 markah]

Bahan 2

Tradisi rumah terbuka secara tidak langsung merapatkan hubungan di antara jiran tetangga. Inilah peluang untuk mereka mengenali jiran serta keluarga mereka. Era globalisasi kini sudah banyak merapatkan hubungan antara manusia dengan kehadiran peralatan teknologi yang canggih sehingga seorang manusia itu tidak bergaul lagi dengan orang pada sekeliling. Situasi sebegini amat sukar untuk diselesaikan apatah lagi kesibukan dengan kerjaya masing-masing. Jadi, amalan rumah terbuka, sedikit sebanyak memberikan ruang kepada ahli-ahli kejiwaan untuk sekurang-kurangnya mengenali jiran mereka.

[5 markah]

- 4 *Baca petikan bahasa Melayu klasik di bawah dengan teliti. Kemudian tulis semula petikan tersebut dalam bahasa Melayu standard tanpa mengubah struktur dan maksud asalnya.*

Setelah diketahuinya, maka Kertala Sari pun masuk menyamar pada orang Patih Kerma Wijaya. Tatkala itu Kertala Sari pun masuk seorangnya mengikut Patih Kerma Wijaya pergi menghadap sama dengan Jawa yang banyak itu. Maka oleh Kertala Sari segala hulubalang yang menghadap sama-sama itu dilihatnya seorang kepada seorang. Maka Kertala Sari pun pandang pada Laksamana; maka ia pun fikir dalam hatinya, “Dialah gerangan hulubalang Ratu Melaka yang bernama Laksamana itu.

Dipetik daripada
‘Kepimpinan Melalui Teladan’
dalam antologi *Jaket Kulit Kijang dari Istanbul*,
Kementerian Pendidikan Malaysia

[4 markah]

- 5 *Baca petikan di bawah dengan teliti. Kemudian nyatakan tiga peribahasa yang sesuai dengan situasi dalam petikan tersebut.*

Gejala sosial dalam kalangan remaja begitu membimbangkan. Walaupun telah diberi teguran dan dinasihati oleh keluarga, guru dan masyarakat pelbagai masalah sosial terus berlaku. Ada di antara remaja terbabit telah ditangkap dan dihantar ke pusat serenti atau pusat pemulihan akhlak. Golongan ini memang menyusahkan masyarakat yang cinta akan kedamaian. Walaupun begitu, ibu bapa dan keluarga mereka tetap tidak berputus asa, malahan terus berusaha untuk memastikan masalah ini dapat diatasi.

[6 markah]